

Þorsteinn Thorsteinson



Ég hef setið í aðalstjórn Hundaræktarfélags Íslands síðastliðin tvö ár og gef nú kost á mér til endurkjörs.

Ég hef verið félagi í HRFÍ síðan 1997 og fékk ræktunarnafnið mitt, Sunnusteins, viðurkennt á sama tíma. Ég hafði þá átt hunda í nokkur á og sýndi í fyrsta skipti á hundasýningu árið 1991.

Ég bý á Flúðum í Hrunamannahreppi, rækta íslenska fjárhunda og saluki. Óhætt er að segja að allur aukatími sem ég hef fari í hundana, í bókstaflegri merkingu en ég á 9 hunda, 5 íslenska og 4 saluki.

Ég hef áhuga á hundarækt í öllum skilningi þess hugtaks. Hundarnir mínir eru og verða ávallt fyrst og fremst ákkúrat það, hundarnir mínir. Þeir búa inni á heimilinu og þeirra stærsta hlutverk verður ávallt að vera „bara“ fjölskylduhundar.

Ég sat í stjórn DÍF, deild íslenska fjárhundsins, í sjö ár, starfaði þar sem meðstjórnandi, ritari og formaður og var fulltrúi deildarinnar í fjögur ár á fundum í alþjóða samstarfinu um íslenska fjárhundinn, Icelandic Sheepdog International Cooperation (ISIC). Í tvö ár sat ég í stjórn DÍF sem

tengiliður stjórnar HRFÍ. Fyrir rúnum tveimur árum öðlaðist ég réttindi sem sýningadómari á þjóðarhundinn okkar, íslenska fjárhundinn. Málefni íslenska fjárhundsins standa mér afskaplega nærri enda má líta á verndun og varðveislu þjóðarhundsins okkar sem kjarnann í starfi Hundaræktarfélags Íslands.

Áhugi minn einskorðast ekki við þær tvær ólíku tegundir sem ég hef valið mér. Ég hef áhuga á öllu því sem viðkemur hundum og hef sótt ýmis námskeið og fyrirlestra sem HRFÍ hefur boðið upp á í gegnum árin. Þar höfum við slakað á og þurfum að auka framboð fyrirlestra og námskeiða innan félagsins, bæði fyrir ræktendur og hinn almenna félagsmann.

Í þrjú ár vann ég með skapgerðarmatshópi HRFÍ og fékk þar réttindi sem leikmaður (figurant). Þetta var gríðarlega áhugaverður tími og ég lærði margt af þeirri vinnu um atferli og eðli hunda.

Sámur, blað HRFÍ, er mér hugleikið enda er það okkar helsta mál gagn. Ég sat lengi í ritnefnd félagsins og þýddi og skrifaði hinar ýmsu greinar fyrir Sáum um margvísleg málefni sem þóttu eiga erindi við félagsmenn.

Ég hef lengi starfað á hundasýningum félagsins, er með réttindi sem hringstjóri og gef kost á mér í vinnu í dómhring þegar ég er ekki að sýna mína eigin hunda. Án sjálfboðastarfs væru sýningarnar okkar ekki mögulegar og maður lærir alltaf eitthvað nýtt á hverri sýningu.

Ég hef séð um og leiðbeint á námskeiðum fyrir nýja hringstjóra og ritara og undanfarin 4 ár hef ég auk þess starfað í sýningastjórn félagsins og síðastliðið ár einnig í sýninganefnd. Við getum verið stolt af sýningunum okkar, umgjörð og starfsfólkinu og sýninganefndin vinnur ávallt að því að gera góðar sýningar enn betri.

Félagið okkar hefur vaxið mikið á undanförunum árum og innan þess unnið gríðarmikið og gott starf. Við sem höfum unnið saman í stjórn félagsins undanfarin tvö ár komum úr ólíkum áttum. Samstarfið hefur verið mjög gott og með ykkar stuðningi langar mig til að fá tækifæri til að vinna áfram í þeim anda og að þeim verkefnum sem núverandi stjórn hefur unnið að. Má þar nefna gagnagrunn og tölvukerfi fyrir félagið, það er aðkallandi verkefni sem leitað er lausna á.

Hundamenningin hér á landi er í stöðugri sókn en við mætum ennþá gamaldags viðhorfum til hunda og hundahalds. Viðhorfsbreytingar í samfélaginu taka tíma og við hundaeigendur verðum að vanda okkur, sýna ábyrgð og vinna saman að hagsmunamálum okkar. Félagið okkar verður aldrei sterkara en við félagarnir og því megum við aldrei gleyma.

Mér þykir vænt um Hundaræktarfélag Íslands og óska eftir ykkar stuðningi til áframhaldandi setu í aðalstjórn félagsins næstu tvö árin.